



Bosna i Hercegovina
Federacija Bosne i Hercegovine
Tuzlanski kanton
GRAD GRADAČAC

Husein kapetana Gradaševića 4, 76 250 Gradačac, telefon 035-369-750, fax. 035-369-751, e.mail: opc.grad@bih.net.ba, www.gradacac.ba

GRADONAČELNIK

Broj: 02-04-3514/25

Datum, 13.11.2025. godine.

Na osnovu odredbe člana 6. Zakona o kontroli i ograničenoj upotrebi duhana, duhanskih i ostalih proizvoda za pušenje („Službene novine Federacije BiH“, broj: 38/22), člana 15. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06 i 51/09) i člana 111. stav (2) Statuta Grada Gradačac („Službeni glasnik Grada Gradačac“, broj: 10/22), Gradonačelnik Grada Gradačac donosi

ODLUKU

o provođenju mjera zabrane pušenja u prostorijama i službenim vozilima Grada Gradačac

Član 1.

(Predmet)

Ovom Odlukom uređuje se provođenja mjera zabrane upotrebe duhana, duhanskih i ostalih proizvoda za pušenje, uključujući elektronske cigarete, bezdimne duhanske proizvode i biljne proizvode za pušenje, u svim radnim, službenim prostorijama i službenim vozilima Grada Gradačac, te način nadzora nad provođenjem mjera zabrane i obaveze zaposlenika i drugih osoba koje borave u tim prostorijama.

Član 2.

(Definicija pojma pušenje i princip zakona)

(1) Shodno definiciji pojmova u smislu odredbe člana 2. tačka 31) Zakona o kontroli i ograničenoj upotrebi duhana, duhanskih i ostalih proizvoda za pušenje (u daljem tekstu: Zakon), pušenje je radnja koja dovodi do sagorijevanja duhanskih proizvoda i ostalih proizvoda za pušenje, kojom se stvara dim koji se oslobađa direktno u vazduh i udiše ga osoba koja izvršava ove radnje.

(2) U smislu odredbi člana 3. stav (2) Zakona, isti se primjenjuje na duhan, duhanske i ostale proizvode za pušenje, uključujući elektronske cigarete, bezdimne duhanske proizvode i biljne proizvode za pušenje.

Član 3.

(Mjesto rada)

(1) Mjesto rada, shodno definiciji pojmova u smislu odredbi člana 2. tačka 23) Zakona je svaki prostor koji služi za obavljanje poslova i može biti natkriven, polunatkriven, u potpunosti ili djelomično ograđen, bez obzira na vrstu materijala od kojeg je sagrađen kao i svaki povezani i drugi pripadajući javni zatvoreni prostor (hodnici, liftovi, stepenice, zajednički prostori, kafeterije, kantine, toaleti i sl.).

(2) Mjesto rada u skladu sa odredbom člana 2. tačka 23) Zakona uključuje i poslovna vozila pod kontrolom poslodavca, a koja služe za obavljanje poslova i usluga.

Član 4.

(Zabrana pušenja)

- (1) U cilju zaštite zdravlja zaposlenika Grada Gradačac, kao i osoba koje povremeno ili privremeno borave u prostorijama Grada Gradačac, u smislu odredbe člana 6. stav (1) Zakona, zabranjuje se pušenje u svim javnim zatvorenim prostorijama koje koristi Grad Gradačac za obavljanje radnih zadataka, sastanaka, arhiviranje, odmor, kao i zajedničkim prostorijama (hodnici, kafeterija, toaleti, stepenište, čekaonice, šalter sale i sl.).
- (2) Pušenje je zabranjeno i u svim službenim vozilima Grada Gradačac.
- (3) Zabrana se odnosi na sve zaposlenike, stranke, posjetitelje i druga lica koja se zateknu u prostorijama i vozilima Grada Gradačac.
- (4) U smislu ove Odluke pod nazivom zaposlenici, podrazumijevaju se lica koja su u radnom odnosu na neodređeno ili određeno vrijeme, pripravnici/lica na stručnom osposobljavanju, te angažovani spoljni saradnici.

Član 5.

(Označavanje prostorija i vozila)

- (1) Na svim vidno istaknutim mjestima u prostorijama i vozilima Grada Gradačac obavezno se postavlja grafički znak zabrane pušenja (znak precrtane cigarete) i tekst koji glasi: „Zabranjeno pušenje“.
- (2) Oznake se postavljaju na ulazima u zgrade Grada Gradačac, kancelarije, sale za sastanke, hodnike, kao i unutar službenih vozila.
- (3) Zabranjeno je uklanjanje, oštećivanje ili prikrivanje oznake o zabrani pušenja.
- (4) U prostorijama i mjestima gdje je pušenje zabranjeno, ne smiju biti postavljene pepeljare ili druge posude koje mogu poslužiti za odlaganje pepela.

Član 6.

(Obaveze zaposlenika i rukovodilaca Službi)

- (1) Svi zaposlenici Grada Gradačac dužni su poštovati zabranu pušenja i upozoriti stranke i posjetioce na obavezu pridržavanje iste.
- (2) Rukovodioci organizacionih jedinica odgovorni su za nadzor nad provođenjem zabrane u svojim radnim prostorijama.
- (3) Ako zaposlenik prekrši zabranu, o tome se sačinjava službena zabilješka i pokreće disciplinski postupak u skladu sa pozitivnim propisima.

Član 7.

(Odgovornost i sankcije)

- (1) Zbog nepoštivanja zakonskih odredbi o zabrani pušenja, osoba koja se zatekne da puši u prostorijama, prostorima i mjestima rada gradskog organa uprave Grada Gradačac prekršajno je odgovorna u skladu sa odredbom člana 39. Zakona.
- (2) U skladu sa pozitivnim propisima prekršajna odgovornost povlači i disciplinsku odgovornost.
- (3) Stranke i druga lica koja se ne pridržavaju zabrane mogu biti udaljena iz prostorija Grada Gradačac.

Član 8.

(Nadzor nad primjenom)

- (1) Za provođenje ove Odluke odgovoran je rukovodilac organa državne službe.
- (2) Rukovodilac organa državne službe može u svako vrijeme od rukovodilaca organizacionih jedinica, zatražiti pisani izvještaj o provođenju zabrane u službi kojom rukovodi.

Član 9.

(Stupanje na snagu i objava Odluke)

Ova Odluka stupa na snagu danom donošenja i objavit će se na oglasnoj ploči, web stranici Grada Gradačac i Službenom glasniku Grada Gradačac.

Obrađivač: Teneida Novalić.



GRADONAČELNIK
Hajrudin Mehanović

Dostaviti:

1. Svim zaposlenicima Grada Gradačac elektronskim putem-1x;
2. Oglasna ploča Grada Gradačac-1x;
3. Web stranica Grada Gradačac-1x;
4. Stručna služba za poslove Gradskog vijeća-1x;
5. Gradsko pravobranilaštvo Gradačac-1x i
6. a/a-1x.